

**PRAVILNIK  
O IZMJENAMA I DOPUNAMA PRAVILNIKA O OBAVLJANJU KONTROLE  
IZVRŠENJA OBAVEZA IZ KUPOPRODAJNIH UGOVORA U POSTUPKU  
PRIVATIZACIJE U FEDERACIJI BOSNE I HERCEGOVINE**

**Član 1.**

U Pravilniku o obavljanju kontrole izvršenja obaveza iz kupoprodajnih ugovora u postupku privatizacije u Federaciji Bosne i Hercegovine („Službene novine Federacije BiH“, br. 12/05 i 17/06) u članu 10. na kraju teksta, tačka se zamjenjuje zarezom i dodaju se riječi: “najkasnije tri dana po izvršenoj kontroli“.

**Član 2.**

Član 15. mijenja se i glasi:

„Ako ovlaštena lica za kontrolu kupoprodajnog ugovora smatraju da predočeni dokazi nisu valjani, agencija će na teret kupca, angažovati sudskog vještaka odgovorajuće struke radi davanja stručnog nalaza i mišljenja“.

**Član 3.**

Član 16. mijenja se i glasi:

„Kao dokaz konačnog izvršenja obaveze investiranja-ulaganja kupac je dužan dostaviti nadležnoj agenciji nalaz i mišljenje ovlaštene revizorske kuće o ispunjenju ugovorenih obaveza po osnovu investiranja-ulaganja, kao i knjiženju-evidentiranju investicija-ulaganja u poslovnim knjigama društva u skladu sa propisima iz oblasti računovodstva, koju u skladu sa Zakonom o javnim nabavkama izabere nadležna agencija na teret kupca uz obezbjeđenje obaveznog osiguranja na iznos ne manji od 50.000,00 KM za štetu nanesenu nadležnoj agenciji zbog netačnog nalaza i mišljenja“.

**Član 4.**

U članu 19. stav 1. iza alineje 3. dodaje se nova alineja 4. koja glasi:

„Registar društva nadležnog suda i gruntovnicu:

Izvijestiti o odredbama ugovora kojima se ograničava pravo raspolaganja udjelom predmeta prodaje ili se dozvoljava uz saglasnost nadležne agencije za privatizaciju“.

Dosadašnja alineja 4. postaje alineja 5.

**Član 5.**

Iza člana 19. dodaje se novi član 19a. koji glasi:

„Član 19a.

Ukoliko ovlaštena lica u toku kontrole utvrde da se ugovor ne izvršava u ugovorenim rokovima, a ne predloži raskid ugovora, mogu na prijedlog kupca za aneksiranje ugovora i uz obrazloženje razloga neizvršenja obaveza i prijedlog materijalnih dokaza i garancija kako će izvršiti neizvršene obaveze, predložiti direktoru agencije zaključivanje aneksa ugovora sa rokom izvršenja obaveza najduže 12 (dvanaest) mjeseci.

O potrebi anksiranja ugovora nadležna agencija zatražit će mišljenje/stav resornog ministarstva.

Direktor agencije će svojim rješenjem imenovati komisiju za izradu aneksa ugovora.

Ovlašćena lica koja vrše kontrolu izvršenja ugovora obaviti će detaljnu-dubinsku kontrolu obaveza i Izvještaj o utvrđenom stanju dostaviti direktoru agencije i komisiji koja će raditi na izradi aneksa ugovora.

Lica iz stava 4. ovog člana dužna su na zahtjev komisije za izradu aneksa ugovora dati svoje stručno mišljenje u vezi predmeta zaključivanja aneksa ugovora kao i da saraduju u toku rada na izradi aneksa zahtjevanog ugovora.

U slučaju nastalog sudskog i upravnog spora u postupku privatizacije, tek po okončanju sudskog odnosno upravnog spora pitanje aneksiranja ugovora rješavat će se kao pojedinačan specifičan slučaj uz ocjenu svih relevantnih okolnosti“.

#### **Član 6.**

Član 20a. mijenja se i glasi:

„Na prijedlog nadležne agencije za privatizaciju, saglasnost za pokretanje postupka za raskid kupoprodajnog ugovora daje upravni odbor agencije, uz prethodno pribavljanje mišljenja/stava resornog ministarstva“.

#### **Član 7.**

Iza člana 20a. dodaje se član 20b. koji glasi:

„Član 20b.

„O raskidu kupoprodajnog ugovora nadležna agencija će obavijestiti resorno ministarstvo, Upravni odbor agencije, Komisiju za vrijednosne papire u FBiH, Registar vrijednosnih papira u FBiH, Registar nadležnog suda i kupca“.

Dosadašnji član 20b. postaje član 20c.

#### **Član 8.**

Ovlašćuje se Agencija za privatizaciju u Federaciji Bosne i Hercegovine da utvrdi prečišćeni tekst Pravilnika o obavljanju kontrole izvršenja obaveza iz kupoprodajnih ugovora u postupku privatizacije u Federaciji Bosne i Hercegovine.

#### **Član 9.**

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.